

TE HEHEURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 3.

Mati 1930.

Mat. 24.

“E teie nei, e haamana'o, e haamana'o, e au mau taeae,
o te pohe ra, e pohe no'na iho ia, e o te rave i te parau ino,
e rave ra ia oia i te reira no'na iho; inaha hoi, e feia tiamâ
outou; e tia ia outou te rave na to outou iho; inaha hoi, na te
Atua iho mai i te ite no outou, e na'na i faariro ia outou ei
feia tiamâ.” (Helamana 14:30)

Te Faaroo no te Feia Mo'a Mau.

Ua iritihia teie nei parau na roto mai i te buka: “Te Hiro'a Faaroo i
papaihia e Tamate Aposetolo; Faaauhia ei reo Tahiti e Elita.

HIRO'A FAAROO 11. Te haamori nei matou i te
Atua Mana-hope mai tei au i te aaui nei, e e faatia'tu hoi ia
na reira atoa te taata atoa ia haamori, noa'tu te huru, e te
vahi, e te mea ta ratou i hinaaro ra.

Uiraa 9. O vai ratou o tei ô i roto i te basileia teitei, oia
hoi te basileia Teretiera?

P. Te na ô maira te parau i heheuhia mai e: “E teie â
hoi, te faaite atu nei maua no te mea ua ite mau, e ua faa-
roo, e tei hoi te faaiteraa no te Evanelia a te Mesia, no ra-

tou o te tia mai ia tae i te tia-faahou-raa no te feia parau tia: O ratou teie o tei farii i te parau faaite no Iesu, e ua faaroo i to'na i'oa, e ua bapetizohia na roto i te huru no to'na tanu-raa-hia, ua tanuhia hoi i raro i te pape i roto i to'na ra i'oa, e teie ia au i te faaueraa ta'na i horoa mai, e ia haapaohia taua mau faaueraa ra, ia horoihia ia e ia tamahia i ta ratou atoa ra mau hara, e ia farii mai i te Varua Maitai na roto i te tuuraa rima no'na o tei faatoroahia e ua titirohia i teie nei mana; e tei haavi na te faaroo, e ua titirohia e te Varua Maitai o tei parauhia maira, e tate Metua i ninii atu i nia ia ratou atoa ra o tei haapao matai e te tia; o ratou teie o te Ekalesia no te Matahiapo ra; o ratou teie ta te Metua i horoa atu i to ratou rima i te mau mea atoa ra; o ratou teie o te mau tahuá e te mau arii, o tei noaa mai ia ratou i to'na ra iraa, e i to'na ra hanahana, e e mau tahuá hoi ratou no Tei Teitei ra na roto i te haapaoraa ia Melehizedeka ra, o tei na roto i te haapaoraa a Enoha ra, o tei na roto i te haapaoraa a te Tamaiti Fanau Tahira; no reira, i papaihia ai ra, e mau Atua ratou, oia hoi te mau tamarii na te Atua; no reira na ratou te mau mea atoa, te ora e te pohe, te mau mea e vai nei, e te mau mea e vai a muri atu, no ratou anaé ia, e no te Mesia hoi ratou, e na te Atua hoi te Mesia; e faaea hoi ratou i mua i te Atua e i to'na ra Mesia e a muri noa'tu; o ratou teie ta'na e faaaratai atoa mai; ia haere mai oia i roto i te mau ata no te raí, ia arii oia i nia iho i to'na ra mau taata i te ao nei; o ratou teie o tei noaa ia ratou te tia-faahou-raa mata-mua ra; o ratou teie o tei tae mai i roto i te tia-faahou-raa no te feia parau tia ra; o ratou teie o te feia parau-tia i faatiahia na roto ia Iesu i tei arai no te faufaa apí, o tei faatupu i teie nei taraehara tia mau na roto i te haamaniiraa no To'na iho toto; o ratou teie no ratou te tino no te Tiretiera,

e to ratou ra hanahana mai to te mahana ra ia, oia hoi te hanahana no te Atua ra o tei hau i nia roa ra; o to'na hanahana ua papahia te mahana no te reva nei ei taie." (Buka Fafau 76:51-70)

Uiraa 10. O vai ratou o tei noaa ia ratou te piti o te Basileia, oia hoi te Basileia Teretetiera?

P. Te na o maira te heheuraa e: "E teie a hoi, ua hió maua i te ao Teretetiera, e inaha, o ratou teie no te Teretetiera o tei ore i au to ratou hanahana i to te Ekalesia no te Matahiapo, o tei noaa ia ratou te iraa no o mai i te Metua, e oia ia mai te marama hoi e huru e i te mahana o te reva nei. Inaha, o ratou teie o tei pohe mai te ture ore, e o ratou atoa hoi o te mau varua taata o tei vai i roto i te tapearaa ra, o tei haerehia' tu e te Tamaiti, e ua aó atu i te Evanelia ia ratou ia haavahia ratou mai te taata' toa i te tino nei, o tei ore i noaa i te parau no Iesu i to ratou vai oraraa ra, ua farii rā i muri mai; o ratou teie o te mau taata tura no te ao nei, o tei haapourihia ia ratou i te ravea paari a te taata nei; o ratou teie o tei noaa mai i to'na ra hanahana, eiaha rā i to'na ra iraa; o ratou teie o te noaa i te aro no te Tamaiti, eiaha rā i te iraa no te Metua; no reira e mau tino ia no te Teretetiera nei, e ere i te mau tino no te Teretiera, e ua huru e to ratou hanahana mai te marama i taa e i te mahana ra; o ratou teie o tei ore i itoito i te faaiteraa i te parau no Iesu; no reira aore i noaa ia ratou te korōna i nia i te Basileia no to ratou Atua." (Buka Fafau 76:71-79)

Uiraa 11. O vai ratou tei farii i te hanahana haihai, oia hoi te Basileia Tiritia?

P. Te na o faahou maira te heheuraa e: "E teie a hoi, ua ite maua i te hanahana no te Tiritia, o te hanahana huru haihai hoi te reira, mai te ifiraa no te hanahana o te mau

fetia huru ê i te hanahana o te marama i roto i te reva nei; o ratou teie o tei ore i farii ratou i te Evanelia a te Mesia, e te parau faaite hoi a Iesu; o ratou teie o tei ore i huna i te Varua Maitai; o ratou teie o tei hurihia i raro i te pô; o ratou teie o tei ore e faaorahia mai i ô te Diabolo, e tae noa'tu i te tia-faahou-raa hopea ra, e ia hope te ohipa a te Fatu, ta te Mesia te Arenio ra. (Buka Fafau 16:81-86) Ua tatu-faahia taua basileia nei mai te au i te parau i roto i te irava 89-101 no taua pene nei: E te hanahana no te tiretia hoé ia, mai te hanahana no te mau fetia i hoé ra, e mai te huru-ê-raa no te hanahana no te hoé fetia i te tahi pae fetia ra, mai te reira atoa ra te huru-ê-raa no te hanahana no ratou no te ao tiretia; o ratou hoi teie no ô ia Paulô, e no Apolo, e no Kepha; o ratou teie o tei parau e, no te tahi ratou e no te tahi atu, no te Mesia te hoé pae, e no Ioane te hoé, e no Mose vetahi, e no Elia te tahi, e no Esaia te tahi, e no Isaia vetahi, e no Enoha vetahi, aita râ i farii i te Evanelia, e te faaiteraa no Iesu, e no te mau peropheta;" Ua ite-atoa-hia to ratou rahiraa i te na ô raa mai e: "E inaha, e ua ite maua i te hanahana e te feia no te ao tiretia, o te ore e iteahia ia taio ra mai te mau fetia i nia i te raí ra, e mai te one i tahatai ra. No reira ua fariihia ta ratou ohipa maitai, e e farii iho â ratou i tei au i ta ratou ohipa: "E e noaa hoi i te taata'toa i tei au i ta'na ihora ohipa e i to'na ihora hau, i roto ite mau aorai i faanehehehehia ra, e riro hoi ratou ei tavini no Tei Teitei ra, i te vahi ra i parahihia e te Atua e te Mesia ra e ore ia ratou e ô, i te mau ao hopea ore ra." (Buka Fafau 76:111-112)

"E tuatihia teie nei parau"

Te Paturaa ia Ierusalema Api

E te haere tia'tura Iesu i te pae fenua i Kaisarea Philipi ra, ua ui atura oia i ta'na mau pipi, na ô atura, O vai au te Tamaiti a te taata nei i ta te taata nei parauraa? Ua parau maira ratou, o Ioane Bapetizo ta vetahi, o Elia ta te tahi pae, Ieremia hoi, e o te hoê i te mau peropheta ra ta vetahi. Ua parau atura oia ia ratou, O vai râ vau nei i ta outou nei parauraa? Ua parau maira Simona Petero, na ô maira, o te Mesia oe, te Tamaiti a te Atua ora ra. (Mataio 16:13-16)

Mai te mea e, e tauturu mai te Fatu ia'u, e au mau taeae e te mau Tuahine, te hinaaro nei au e faairi i teie tuaroi parau ta'u i taio nei, ei parau tumu no te mau parau poto ta'u e faaite atu i teie nei taime, aita aê nei au i te ite i to'u iho paruturu mai teie te huru, e te tiaturi papu nei au i te Atua ia tauturu mai ia'u i te aratairaa ia tatou na nia i te hoê eâ roa e te taviriviri, o tei faahoi ia tatou na muri, e hoê hanere matahiti.

TE MAU FAFAU TUMU

I roto i te tuaroi ta'u i taio ra o tei parauhia e te Faaora, e o tei faahiti pinepinehia, e tei tuu tamau-hia i mua i te mau amuiraa rahi Chirstiano, te vai ra te mau fafau tumu, ia matauhia e te feia no te Ekalesia e tia'i. E mea ohie te uiraa i uihia'tu: O vai au te tamaiti a te taata nei i ta te taata nei parauraa? E ua faito te ohie o te pahonora, i te vahi i ere ai i te ite; Ua parau maira ratou, o Ioane Bapetizo ta vetahi, o Elia ta te tahi pae, o Ieremia hoi, e o te hoê i te mau peropheta ra ta vetahi; O Petero ra tei pahono tano atu Ia'na. "O te Mesia oe te Tamaiti a te Atua ora ra." Ua parau atura Iesu iana, na ô atura, "E ao to oe, e Simona Bare-iona, e ere ta te taata i faaite mai ia oe i te reira, na tau Metua râ i te ao ra. E parau atoa'tu vau ia oe, o Petero oe, e ei nia iho i teie nei pāpā e patu ai au i tau ekalesia, e ore roa e noaa i te uputa o hade. E e horoa'tu

hōi au i te mau taviri o te basileia o te ao ra ia oe, e ta oe e haamau i raro nei, e haamau-atoa-hia ia i te ao; e ta oe e tuu i raro nei, e tuu-atoa-hia ia i te ao. (Mataio 16:16-19)

TE MAU PARAU MATAMUA NO TE HEHEURAA

Ia haapii-maitai-hia te auraa mau, no teie ne i parau, e faaitēhia mai te tahi na parau rahi, oia hoi, e tia i te ite ite-ore-hia i mua'tu, ia tae mai no ō mai i te Atua ra i ta'na mau tamarī i te fenua nei. E mea papu atoa aita Petero iho i ite nofea mai te tauturu tei parau mai na roto mai ia'na. Na teie rā tuaroi parau e haamaramarama mai, e e haapapu hoi, na te Atua to tatou Metua i parau mai ia na, na roto i te mana, e te mutamutaraa o te Varua Maitai.

Te tahi vahi rahi ta teie mau irava e faaitē mai, oia hoi, ta te Atua ravea no te parauraa mai i ta'na ra mau tamarī i te fenua nei, oia hoi, na roto ia i te Varua Mo'a o te Atua, te Varua Maitai o tei parau mai na roto i te horoaraa heheuraa, e ua patuhia te Ekalesia a Iesu Mesia i te Feia Mo'a i te mau Mahana hopea nei i nia i teie nei parau matamua, te heheuraa.

Te tahi vahi rahi tei faaitē-papu-hia mai e te Faaora o te ao, oia hoi, te mau taviri tei horoahia mai ia Petero, e ia mau te tahi taata êê noa'tu i te reira mau taviri mai ia Petero iho i mau ra, e tae ia te mana i nia ia'na, e au ia'na ia haamau i te mau mea i raro nei, e e haamau-hia hoi ia i nia i te rai, e ta'na e tuu i raro nei ra, e tuu-atoa-hia ia i te ao.

Ua faaitēhia mai te mau mea'toa e au no te aratairaa i te Feia Mo'a i te ora, i te feia faatere, mai te mahana i faatiahia i te Ekalesia e tae noa mai i teie nei ā mahana.

TE EKALESIA PATU HIERO

Te hinaaro nei au i te parau atu i nia iho i te hoē ohipa rahi tei parau-haere-hia e te feia no te Ekalesia, o tei hinaaro ia patu i te hiero i Indipenideni, i Missouri. E feia patu hiero iho ā te Ekalesia a Iesu Mesia i te Feia Mo'a i te Mau Mahana Hopea Nei.

I rotopu i te mau heheuraa matamua, i reira tatou e ite ai i te parau a te Atua no te paturaa hiero, e ua faaitehia ia tatou i roto i te reira heheuraa e, ua faauehia ta'na ra mau taata ia patu i te hiero i te mau tau atoa, ia patuhi te reira e ia faataahia te mau vahi i roto, ia nehenehe ia rave i te mau aroa mai te au i ta te Atua faaueraa. (B.F. 124:39 B.F.S. 107:12)

I roto i te mau mahana matamua no te Ekalesia, ua patuhia te hoé hiero i Ketelani, Ohaio, o te hiero matamua hoi te reira, tei haamaitaihia e te Fatu i teie anotau hopea nei. Hou râ te reira taima ua faaite mai te Atua i te Ekalesia e, o Inidipenideni Missouri ia te titi i ropu mau. (B.F. 57:1) Tehinaaro atoa nei au i te taio i te tahi heheuraa i roto i te Buka Fafau 84:1-5. (B.F.S. 83:1-2)

E heheuraa a Iesu Mesia i to'na ra tavini ia Iosepha Semita (Metua), e e tooono peretibutero, i te amuira i to ratou mau aau e te faateitei-raa-hia to ratou mau re'o i nia roa, oia ia, te parau a te Fatu no to'na Ekalesia, o tei haamauhia i te mau mahana hopea nei, ei faahoi-faahou-raa i to'na ra mua taata, mai tei faaitehia e te vaha o to'na ra mau peropheta, e no te haaputuputuraa i to'na ra Feia Mo'a i nia i te Mou'a ia Ziona, oia hoi, te oire o Ierusalem Apî, e faatiahia hoi te reira oire, e haamaitaihia hoi i te tufaa no te Hiero, o tei faataahia e te rima o te Fatu, i te otia i te toa o te râ i te tufaa ra o Missouri, e ua haamo'ahia e te rima no Iosepha Semita (Metua), e vetahi atu â o tei mauruuru-roahia e te Fatu. Oia mau, o te parau teie a te Fatu, e faatiahia te oire Ierusalem Apî e te haaputuraa no te Feia Mo'a, ia haamatahia i teie nei vahi, oia hoi, i te vahi no te hiero, e hamanihia hoi te reira hiero i teie nei â ui; oia mau hoi, e ore teie nei ui e hope i te mou e faatiahia i te hoé fare na te Fatu, e faaea hoi te ata i nia iho i te reira, e taua atara, o te hanahana ia o te Fatu, e i roa hoi te fare i te reira.

Faaauhia ei re'o Tahiti e Roroma

(E Tuatibia teie nei parau.)

Te Parau Api---Tahito

Ua faaroo tatou atoa i te mau parau no to tatou hoa faatere pahi reva, o Lindbergh, i parau-noa-hia, o Lindy. Ua mauruuru rahi roa tatou ia'na no te mau ohipa ta'na i rave. I teie nei râ, te faaroo faahou nei tatou i te parau api no taua hoa no tatou nei. Ua faatere oia i to'na pahi reva na te mau vahi apatoa no Amerika apatoerau, i te imiraa i te mau ohipa tahito no te hoé feia tei parahi i taua fenua Amerika i mutaa ihora, e ua itehia hoi taua mau mea tahito ta'na i imi ra.

Ua itehia e ana te hoé mau oire tahito roa, ua ino, e ua pê hoi te tahi mau vahi, noa'tu râ i te reira, te ite-noa-hia nei e, e mau oire ia no te hoé feia tahito roa. Ua parauhia e te hoé mau taata paari no teie nei ao e, ua faatiahia taua mau oire tahito ra, hou te tau no to tatou Faaora o Iesu Mesia

E ere o Lindy ana'e tei imi i taua mau ohipa tahito ra, te haere noa nei te tahi mau orometua rahi no te mau haapiiraa teitei i te fenua Amerika, i te imi-atoa-raa i te reira mau mea, e te ite noa nei ratou i te mau ohipa na taua feia tahito tei parahi i te fenua Amerika i mutaa ihora, e te parau noa nei ratou e, te vai ra te hoé feia tei parahi i te fenua Amerika i te mau tau tahito roa, aita râ ratou i ite e nofea mai taua feia tahito nei.

E teie nei, e haere tatou i nia i te tahi parau no te pae apatoerau roa no te fenua Amerika, oia hoi, i te fenua Alaska. Te imi atoa nei te mau taata paari i te mau ohipa tahito i taua fenua ra, e ua ite-atoa-hia ia.

Te vai ra te mau taata paari, o Roy Chapman Andrews, e Henry Fairfield Osborn te i'oa no na taata toopiti, e te vai atura te tahi mau taata paari, ua faatia mai ratou i te

manao e, no te fenua Asia mai te mau tupuna no te Inidia e parahi nei i te fenua Amerika. Ua imi noa ratou i te tahi mau ohipa tahito i te fenua Alaska, ei faatiaraa i to ratou ra mau manao, e i teie nei ra, ua itehia te ohipa ta ratou i hinaaro.

Ua haere te tahi na taata, Mr. McCracken e Edward Weyer to raua i'oa, i te imiraa i te tahi ohipa tahito, e ua itehia te hoê tino o tei pohe ê na i te tau tahito. Ua hiopoâ te mau taata paari i taua tino pohe ra, e ua na ô maira ratou e, o te tino tera no te hoê arii o te mau taata tei parahi i te fenua Amerika i te mau tau i mutaa ihora, e no te mea e arii oia, i to'na poheraa ua rave-maitaihia to'na tino, e no reira aita oia i pêino roa, te vai noa ra te i'o i nia i to'na ra mau ivi. Ua na o maira te mau taote e te mau taata paari e, na taua tino pohe i itehia ra, e haapapu mai i to tatou mau manao e, no te fenua Asia mai te mau tupuna o te ati Inidia e parahi nei i te fenua Amerika ra.

UA HAPE ANEI TE BUKA A MOROMONA

Ua taio anei tatou i te Buka a Moromona? E, ua taio tatou, e ua ite tatou e, te vai ra te hoé feia tahito i nia i te fenua Amerika. Na taua Buka a Moromona nei e haapii, e e haapapu hoi i te mau mea'toa ia tatou nei. Na te Buka a Moromona e haapii mai ia tatou nei, na te Atua i aratai i taua feia tahito ra, mai te fenua Ierusalema, e tae noa'tu i te fenua Amerika, e na Asia ratou i te haere, tei taua fenua Asia ra te faatiaraa i to ratou pahi, e no reira ua taati-maitaihia te manao o te mau taote e te feia paari o teie nei ao, i te mau parau tuatapaparaa tei papaihia i roto i te Buka a Moromona.

Na taua Buka nei e faaite mai ia tatou i te mau ohipa ta

te ati Nephi, e te ati Lamana, e te feia'toa tei parahi i te fenua Amerika i rave, ta ratou faapuraa, ta ratou faatiaraa i te mau hiero, e te mau fare nehenehe, e tae noa'tu i ta ratou mau ohipa Evanelia, e e tae noa'tu i to ratou mau tama'i. E na roto i te taioraa i te Buka a Moromona, ua ite tatou e, ua tama'i noa te ati Nephi e te ati Lamana, e tae noa'tu i te haapau-roa-raa-hia o te ati Nephi, e ua ora noa mai te ati Lamana i nia iho i te fenua Amerika, mai te reira tau e tae roa mai i teie nei â mahana, e i teie nei ua parauhia ratou te mau Inidia.

E PEROPHETA ANEI IOSEPHA SEMITA NA TE ATUA?

Aita e nehenehe ia parau tatou e, ua papai Iosepha Semita i teie nei Buka a Moromona na roto i to'na iho feruriraa. I te tau oia i papai ai i taua parau ra, aita hoé ohipa tahito i itehia, e no reira aita Iosepha Semita i ite i taua mau mea ra. Na roto râ i te mana ta te Atua i horoia ia'na, ua iriti mai oia i te Buka a Moromona, e i teie nei te ite nei tatou na roto i te mau mea e tupu nei, te faatiahia nei te Peropheta Iosepha Semita, e te Buka a Moromona atoa hoi.

E haamana'o tatou e, ua tuu-ê-na-hia mai te Buka a Moromona, ua hope hoé hanere matahiti mai te iritiraahia, e tae roa mai i teie nei, aita râ te mau taata i farii i te reira, ua parau noa ratou e, e haavare ana'e ia. I teie nei ra, te ite noa nei ratou i te mau ohipa na te hoé feia tahito tei parahi i te fenua Amerika, o te feia ia ta te Buka a Moromona i faaite maira, e te parau nei ratou e, aita ratou i ite nofea mai taua feia tahito ra. E au ia ia faiohia te Buka a Moromona, i te mea e, te taati mai nei taua mau parau i to ratou ra mau mana'o.

Na te Buka a Moromona, o tei patoi-noa-hia i te mau matahiti ae'nei, e faatia, e e haamaramarama mai temanao

no te feia paari o teie nei ao. "Ua maiti rá te Atua i te mau mea maamaa o te ao nei, ei faahaama'tu i te feia paari, e ua maiti hoi te Atua i te mea paruparu o te ao nei, ei faahaamaraa'tu i te feia puai; e te mau mea haehaa o te ao nei, e te mau mea i vahavahahia ra, e te mau mea aore ra, o tei maitihia ia e te Atua, ei faaore i te mau mea e vai nei. (I Korinetia 1:27-28)

Papaihia e Tihoti Fowera

Te Mau Parau Apî

UA PUPUHIHIA TE TAHI LUKO RAHI

Ua mauruuru roa te mau tiaí puaatoro no Cache County, Utaha, i te mea e, ua pupuhihia te hoé luko rahi roa. Ua riro hoi taua luko ra, e peapea rahi na te mau tiaí puaatoro, no te mea ua taparahi oia i te mau puaatoro e rave rahi. I teie nei rá, ua afaihia'tu taua luko ra i te fare hau, e e aufaibia mai te moni i te taata tei pupuhi ia'na ra. Ua parau maira te mau taata e, o te luko rahi te reira tei itehia i taua feuaa ra. E ono avae e te afa to'na roaraa, e e ono ahuru ma vau kilo to'na teiaha.

E FARE RAHI

Te raí ra, o te hopea ia i te teitei, e e tae te hoé fare to-roa no Niu Yoka i reira. Ua tamata noa te mau taata paari e faatiti aua i te faatiaraa i te fare teitei i roto i te ao nei, e i teie nei ra, e mea papu roa, e riro te rê i te oire rahi o Niu Yoka. Te vai nei te opuáaraa no te hoé fare teitei roa, e te rahi atoa hoi, hoé tauatini e piti hanere e piti ahuru aore avae i te roaraa, e hoé tauatini e piti hanere e piti ahuru avae hoi te aanoraa no taua fare rahi i te pae iraro, e hoé tauatini e ono hanere avae te teitei uo taua fare i opuahia ra. E riro te pae i nia no tana fare nei, e vahi tauraa no te mau pahí reva, o tei mau haere na roto i te reva. E pae ahuru tautuini ia te rahiraa o te feia rave ohipu i roto i te reira

fare, e ua haamanaohia, e tomo e piti hanere tauatini taata i roto i taua fare rahi ra, i te mahana hoé. E riro hoi te reira fare rahi e oire, ona ana'e iho.

OHIPA API NA TE PUAATORO

Te haere noa nei te ao nei i te ite e te mara mara, e i teie nei, ua itehia te hoé ohipa api na te puaatoro, oia hoi, na roto i to'na ra u. E iritihia mai te vahi maitai no te u, no te hamaniraa i te pata, e te ice cream, e te mau maa monamona, te toe râ o te u, e ravehia ia na roto i te hoé ravea paari, e e hamanihia te tahi mau mea nehenehe roa, mai te tapea rima, te tapea taria, te aufau tipi, te mau pitopito nehenehe, te tuiira, te peni, te pahere, e e rave rahi atu â te mau mea e oti, na roto i teie ohipa apî e te paari hoi.

E MANU INO HOI

Ua tonono atura te tahi manu patia iti na taata toopae i te fare mai, e ua ino roa'toa te tahi pereoo maitai ia'na ra. Te faahoro ra te hoé taata Peretita e to'na na hoa toomaha i to ratou pereoo, e a tere noa'tu ai ratou, ua tomo te hoé manu patia i roto i te pereoo. Ua haamata te taata faatere i te tairi atu taua manu patia ra, ua moe paha ia'na i te ohipa ta'na e rave i taua taime ihora, e a tairi noa'i oia i te manu patia, ua â to ratou pereoo i nia iho i te hoé tumu raau, parari roa'tura te pereoo, e ua ino te taata faahoro pereoo, e to'na atoa ra mau hoa, no taua manu patia iti ra.

M. Bonnet M. Gerant et Imprimeur,
Rue Brea et de la rue Dumont d'Urville, Orovini, Papeete